

Naprawy ze swójskej energiju zwoprawdzić

Njebjelčicy (SN). Město prawidłowneho měsačneho posedženja su so zapóslancy Serbskeho sejma minjeny kónc tydženja na dwudnjowskej džěłowej klawsurje w Njebjelčicach schadźowali.

Na spočatku steješe tak mjenowana refleksiska džěłarnička. Serbski sejm je prawdžepodobnje jenički parlament swěta, kiž swoju džěławosć z pomocu wuběrka prawidłownje sam pruwuje. Tak mjez druhim wšitke wobzamknjenja hladajo na swoju skutownosć přepytuje. W srjedźišću steji prašenje, kak so serbski lud w Serbskim sejmje wobtělšuje.

Druhi džěl schadźowanja steješe w znamjenju intensiwneho wuběrkowego džěła. W kubłanskim wuběrku zaběrachu so dale z kubłanskej konferencu, kotraž ma so nazymu wotměć. W diskusijach zwěsćichu, zo njejsu stajnje nowe žadanja statnym instancam napřečo prawy puć, ale zo dyrbjeli naprawy ze swójskej energiju zwoprawdzić. To płaći za šulski system, ale tež za nuznje trěbnu rěčnu šulu runje tak kaž za masiwny wutwar serbskorěčnych rozhłosowych a telewizijnych wusyłanjow.

W prawniskim wuběrku rěčachu mjez druhim wo tym, kak móhli Serbja z alternatiwnymi modelami zastupnistwo w krajnymaj sejmomaj zaručić, po tym zo je dotalny model dobrowólneje nominacije serbskich kandidatow w stronach zwrěšćić. Tež prašenje statneho zrěčenja k přenjesenju wotpowědnych kompetencow za skutownu kulturnu a kubłansku awtonomiju su wobjednali.

Nic naposledk schwalichu zhromadnu deklaraciju z druhimi zwjazkami k zachowanju wšitkich brunicy dla wohroženych serbskich wsow.